

Date – 09/10/2024

Time - 7:30 -7:40Hrs

- Larsap Pu Indra Sena Reddy Nallu chuan Sairanga FCI Godown sak hna chawlh lailawk mek chungchang chinfel theih dan tur a ngaihven.
- Mizorama internet leh phone service a changtlun zawk nan, ICT Department leh hemi kaihhnawih company hrang hrangte nimin khan an thukhawm.
- Jammu and Kashmir leh Haryana Assembly inthlan vote chhiar zawh niin Haryana-ah BJP leh Jammu & Kashmir-ah Congress leh an thawhpuite an sawrkar dawn.
- Prime Minister Narendra Modia chuan ni hnih thangin tun thla ni 10 hian Laos a tlawh dawn.



**GOVERNOR**

Larsap Pu Indra Sena Reddy Nallu chuan Sairanga FCI Godown sak hna chawlh lailawk mek chungchang chinfel theih dan tur Land Revenue & Settlement, Environment, Forests & Climate Change leh Food Corporation of India hotute nimin khan a sawipui a.

Larsap chuan hmasawna ruhrel pawimawh siam a nih hmain nakin lawka harsatna a awm loh nana fimkhur tlan a tul thu sawiin, hemi kawngah hian a kaihhnawih department hrang hrangte inkarah thawhhona tha a awm a pawimawh a ti a. FCI Godown chu Mizoram mipui tana pawimawh tak a nih avangin Sawrkar laipuiin a phut angte pawh a ranglama bawhzuia chinfel thuai tum tur leh, FCI Godown sak hna tawpsan lailawk chu tan leh thuai a nih theih nana tan la turin official-te a chah a. Project tan tawh leh kalpui mek, engemaw rokhawlhna avanga tawp lailawkte chu chinfela zawhfel thuai a tul thu a sawi bawh.

He hunah hian Sairanga FCI Godown sak hna kalpui tawh dan leh thlen chinte, Forest Department atanga Riverine Reserved Forest tia tawpsan rih tura hriattirna pek chungchang leh Ministry phut anga hmalak ngaite sawiho a ni a. Hemi atana Compensatory Afforestation tur ram dawnfel a nih tawh thu tarlan a ni a. FCI Godown sak mek chu project pawimawh tak leh Mizoram tana tangkai tur a nih avangin tikhawtlai zel lova puitlin thuai a nih theih nana hmalak ho dan turte pawh sawiho a ni.

He huna tarlan a nih danin Sairanga FCI Godown sak hna hi kum 2021 vel khan Supply Department ram Hectare 3.1 vela zau hawhtira sak a ni a. Buhfai Metric Ton 10,000 leng thei tura ruahman a ni a, building pathum sak tur zingah buhfai Metric Ton 5,000 leh Metric Ton 2,500 leng building sak hna zawhfel thawkhat niin, Metric Ton 2,500 leng building pakhat leh a kentel pawimawh dangte sak hmabak a la awm a ni.



**TB FREE WORKPLACE**

Health Minister Pi Lalrinpuiin National Health Mission hnuai hmalakna pakhat, ‘TB Free Workplace Initiative’ chu Mizoram Sawrkar office– MINECO ah nimin khan a hawng a.

He hun hi Chief Secretary Pi Renu Sharma, Health Secretary Pi Sangchhin Chinzah leh NHM Mission Director Pu Eric Zomawia te bakah Health & Family Welfare Department a thawktuten an hmanpui a ni.

Khawvel pum ah TB umbo beihpui thlak mek a ni a, Kum 2025 ah chuan TB natna tihrem hman tumin kawng hrang hranga hmalak a nih tawh hnuin 'TB Free Workplace Initiative' hi tun tum a hmalakna turin duan thar a ni leh a ni. He hmalakna kaltlang hian thawktute chuan dam lo leh TB inringhlel te chauh endik tawh lovin, mipuite chu an hnathawhna hmuh ah kal chilh a, a duh apiang tan a test kalpui tum a ni.

He hmalakna hnuai ah hian 'Portable digital X-ray machine' leh AI assisted diagnostic software hmangin TB vei leh vei loh hi Doctor ten rang takin an endik nghal thei a. Vawiin ah pawh nilengin MINECO ah chuan a duh apiang tan a free in test hi an kalpui a, hnathawhna hmun hrang hrangah pawh la kalpui zel tur a duan a ni.

## **ICT DEPT**

Mizoram chhunga internet leh phone service a changtlun zawk nan, ICT Department leh hemi kaihnawih company hrang hrangte nimin khan an thukhawm a,

He hun hi Pu Amit Sharma, Special Secretary, Information & Communication Technology (ICT) Department kaihhruaina-in ICT Department Conference Hall Aizawlah neih a ni a, ICT Department hotute leh Telecom Service Provider (TSP) hrang hrang; BSNL, Reliance Jio, leh Airtel aiawh ten Mizoram chhunga Telecommunication lama hmalakna leh Mobile connectivity leh service dinhmun an thlir ho bakah tun dinhmun a Telecom Service Provider-ten Mizoram chhunga an hmalak mekna report pe in, mobile connectivity / service tih changtlunna tura an hmachhawp hrang hrangte an tarlang bawk.

He hunah hian Lengpui Airport hmun a mobile connectivity / service tha tawklo chungchang an sawiho a, Lengpui Airport chu tih changtlun mek leh hnathawh mek ni mahse, tun aia mobile connectivity leh service tha zawk a awm theih nan ICT Special Secretary chuan Service Provider-te chu a rang lam a theihtawp chhuah tura ngen in hmalakpuiiah telecom company te hi a sawm nghal a , Telecom Service Provider-te pawhin Mizoram chhunga an hmalakna kawnga harsatna an tawh hrang hrangte sawiin, a tul angte State Broadband Committee (SBC) meeting-a sawiho tur a chhawp chhuah tha an ti a, Mobile tower leh radiation chungchangah mipuite hnena in zirtirna kalpui tura rawtna siam a ni bawk.



## **RD**

Rural Development Department chuan Department hnuai scheme hrang hrangte District leh Block level-a Officer te'n an kalpui dan thlirletna hun nimin khan Aijal Club-ah an hmang a. Prof. Lalnilawma, Department changtu Minister chuan he hun hi a hmanpui.

Pu Lalnilawma chuan Rural Development Department chu mipuite dawr tam ber Department leh hmuh theiha an hna thawhte lansarh berna Department a nih thu sawiin, Officer-te chu fimkhur taka hna thawk turin a chah a. Department hnuai hna thawhte thlirletna thutkhawm neih thin chu Department tana a pawimawhzia tarlangin, thlen chin atanga hmasawn zel tur chuan kan thlen chin hriat chian chu tihmakmawh a nih thu a sawi a. Officer kalkhawmte chu Sawrkar kutke ber an ni tih hrethiam turte, inveng renga rinawm leh dik taka hna thawk turtea chahin, sawrkar kalpui mek 'Project Rotling' tihhlawhtlin kawngah theihtawp chhuahpui zel turin a sawm nghal bawk a ni.

He thutkhawmah hian Rural Development Department hnuaiia scheme hrang hrangte kalpui dan bihchian a ni a. State Cell MGNREGA kaltlanga District leh Block hrang hrangte dinhmun ngaihthlak a ni a. Directorate of Rural Development atangin BADP, PMKSY-WDC 2.0, SAGY leh SASCI kalpui dan thlirletna presentation bengvarthlak tak ngaihthlak a ni a. MzSRLM kaltlanga SRLM leh DDU-GKY kalpui dante pawh ngaihthlak a nih hnuah Social Audit Unit, MISSAAT, SIRD & PR, Project Director leh BDO thenkhat hnen atangin report ngaihthlak a ni bawk.

<><><>

#### **VC DRAFT BILL**

LAD Minister Pu C. Lalsawivunga hovin nimin khan Mizoram State Veterinary Council Conference Hall-ah The Mizoram (Village Council) Draft Bill, 2024 chungchanga inrawnkhawmna leh sawihona neih a ni a, sawiho tum 2-na a ni.

Meeting-ah hian tuna Village Council inenkawl nana hman mek The Lushai Hills District (Village Council) Act, 1953 chu Mizoram UT a nih atang daih tawha hman a nih avang leh tunlai khawsakphung leh changkanna nen inhnerem lo tam tak a awm tawh avangin he dan hi ennawn a ngai tih sawilan a ni a. Ngaihndan hrang hrang sawiho niin kan ram mila democracy chhawmnung reng a, kalpui zel ni se tih a ni bawk.

Thutkhawmah hian The Mizoram Village Council bill 2024 drafting committee te'n an draft bill siam chu uluk taka ennawnin, tihdanglam ngai leh siamthat, belh leh paih-a ennawn a ni.

Consultative meeting hian Draft bill ennawn ngai, vawiina la tihfel hman loh chu Drafting Committee-in lo buaipui tura tih a ni bawk.

Puan tawh angin he dan hi Mizoram State Assembly-in a Pass hunah Municipalities, Lai, Mara leh Chakma Autonomous District Council huam lovin Mizoram pumah hman tur a ni ang.

He thutkhawmah hian Pu Lalmuanpuia Punte, Advisor to CM (Political), Secretary leh Director, LAD, Official, Pensionersaiawh, Political Party aiawh, MHIP hruaitute bakah Drafting Committee Member-te an tel a ni.

<><><>

#### **COUNTING OF VOTES**

Jammu and Kashmir leh Haryana Assembly inthlan vote chhiar zawh niin Haryana-ah BJP leh Jammu & Kashmir-ah Congress leh an thawhpuite an sawrkar dawn. Haryana-ah hian BJP in seat 90 atanga sawrkarna siam thei tur zat 46 khumin seat 48 ah an chak a. Congress in seat 37 an la thung a ni. Prime Minister Narendra Modia chuan Haryana-a a term thum nana an sawrkar leh tur chu lawmawm atih thu sawiin sawrkar tha leh hmasawmna chuan mitin vote a hui a ni a ti a. An party worker-ten tha thlah loa taima taka an thawh vanga chak an nih thu a sawi bawk a ni.

Hetihlai hian Jammu & Kashmir-ah chuan Congress leh National Conference tangdun te bial 48 ah chakin sawrkar an siam dawn a. BJP te 29 ah an chak a ni a. PDP in 3 ah leh midangin 9 an la a ni.

Jammu and Kashmir-ah hian candidate 873 an awm a. Counting center 28 siam a ni a. Assembly bial 90 ah tun September ni 18 leh ni 25 ah leh October ni 1 ah te vote thlak a ni a.

Haryana ah hian Counting sentre 90 siam a ni a. Assembly member 90 thlang turin tun thla ni 5 khan vote thlak a ni thung.

<><><>

## PM IN LAOS

Prime Minister Narendra Modia chuan ni hnih thangin tun thla ni 10 hian Laos a tlawh dawn a. A cham chhungin ASEAN-India Summit vawi 21 na leh East Asia Summit vawi 19-na a hmang dawn a. Laos hi ASEAN ah chairman lai a ni a. Prime Minister Modia hian a cham chhung hian Summit karlakah ramdang hruaitute a kawm dawn bawk a ni.

